



REPUBLIKA E SHQIPËRISË  
KËSHILLI I MINISTRAVE

**PROJEKTVENDIM**

Nr. \_\_\_\_\_, datë \_\_\_\_\_

**PËR**

**DISA SHTESA DHE NDRYSHIME NË VENDIMIN NR.914, DATË  
29.12.2014, TË KËSHILLIT TË MINISTRAVE, “PËR MIRATIMIN E  
RREGULLAVE TË PROKURIMIT PUBLIK”, TË NDRYSHUAR**

N mb shtetje t nenit 100 t Kushtetut s dhe të nenit 75, të ligjit nr. 9643, dat 20.11.2006, “P r prokurimin publik”, t ndryshuar, me propozimin e Kryeministrit, K shilli i Ministrave

**V E N D O S I:**

Në tekstin e Rregullave të Prokurimit Publik, bashkëlidhur vendimit nr. 914, datë 29.12.2014, të Këshillit të Ministrave, të ndryshuar, bëhen shtesat dhe ndryshimet e mëposhtme:

**Neni 1**

Në nenin 2 “Prokurimi i përqendruar”, bëhen këto shtesa dhe ndryshime:

1. Emërtimi i nenit riformulohet me këtë përmbajtje:

“Prokurimi i përqendruar dhe delegimi i prokurimit”.

2. Në pikën 1, pas fjalëve “... ose shërbimeve të njëjta” shtohen fjalët “si dhe/ose lidhjen e marrëveshjes kuadër për punë, furnizime ose shërbime të caktuara”.

3. Në pikën 2 shtohet një paragraf me këtë përmbajtje:

“Ministritë ose institucionet e tjera, që kanë në varësi disa autoritete kontraktore, mund të prokurojnë në mënyrë të përqendruar, për autoritetet kontraktore të varësisë”.

4. Pas pikës 2 shtohet pika 2.1 me këtë përmbajtje:

“2.1 Nëse një ose disa autoritete kontraktore kanë nevojë të prokurojnë mall/punë ose shërbim, ata mund të bien dakord të delegojnë të drejtën e kryerjes së procedurës së prokurimit një autoriteti tjetër kontraktor për shkak të kapaciteteve që ky i fundit ka në fushën e objektit të prokurimit.

Autoriteti kontraktor, të cilit i është deleguar e drejta e prokurimit është plotësisht përgjegjës për kryerjen e të gjithë procedurës së prokurimit, që nga njoftimi i kontratës deri te publikimi i njoftimit të shpalljes së fituesit, ndërsa nënshkrimi i kontratës bëhet nga vetë autoriteti/et kontraktor/e përfituese”.

## Neni 2

Në nenin 3 “Buletini i Njoftimeve Publike”, gërma “c” riformulohet me këtë përmbajtje:

“c) lista e operatorëve ekonomikë të përjashtuar nga pjesëmarrja në prokurimin publik, nga koncensionet/partneriteti publik privat apo nga pjesëmarrja në ankandet publike, si dhe arsyet e këtij përjashtimi, në bazë të pikës 3, të nenit 13, të LPP”.

## Neni 3

Neni 4 “Regjistri i parashikimeve të prokurimit publik”, riformulohet me këtë përmbajtje:

“Neni 4

Regjistri i parashikimeve të procedurave të prokurimit publik

1. Në bazë të kërkesave për punë, mallra ose shërbime, autoriteti kontraktor është përgjegjës për përgatitjen dhe dorëzimin e regjistrit vjetor të parashikimeve për

procedurat e prokurimit publik, në përputhje me formën dhe mënyrën e parashikuar në udhëzimet e APP-së.

Ky regjistër duhet të përgatitet brenda 5 ditëve nga miratimi i ligjit për buxhetin.

Autoriteti kontraktor ka detyrimin të krijojë regjistrin e parashikimeve në sistemin e prokurimit elektronik dhe publikimi i tij nga APP do të bëhet brenda tre ditëve nga dita e nesërme e punës e krijimit të tij në sistem.

APP nuk do të lejojë publikimin e regjistrave të parashikimeve, të cilat nuk janë hartuar në përputhje me kërkesat e legjislacionit të prokurimit publik.

Një kopje e regjistrit të parashikimeve duhet të dërgohet në Drejtorinë e Buxhetit dhe Thesarit në Ministrinë e Financave dhe në institucionin qendror që vë në dispozicion fondet buxhetore, në rastin kur ka një të tillë.

2. Çdo autoritet kontraktor, i cili do të luajë rolin e organit qendror blerës dhe autoriteti, të cilit i është deleguar e drejta për prokurim (nëse është rasti), duhet të krijojë një regjistër parashikimi për procedurat e prokurimit që do të zhvillohen prej tyre, menjëherë me mbledhjen e të dhënave, por në çdo rast jo më vonë se data 30 Dhjetor e çdo viti.

Organi qendror blerës dhe autoriteti, të cilit i është deleguar e drejta për prokurim (nëse është rasti) kanë detyrimin të krijojnë/modifikojnë regjistrin e parashikimeve në sistemin e prokurimit elektronik dhe publikimi i tij nga APP do të bëhet brenda tre ditëve nga dita e nesërme e punës e krijimit të tij në sistem.

3. Organet e pushtetit vendor, ndërmarrjet shtetërore apo çdo autoritet kontraktor tjetër, përveç atyre të parashikuara më lart, përgatisin regjistrin e parashikimeve të procedurave të prokurimit publik, jo më vonë se 10 (dhjetë) ditë pas miratimit të buxhetit apo planit të blerjeve nga këshillat vendore ose nga organet drejtuese përkatëse.

Këto autoritete kontraktore kanë detyrimin të krijojë regjistrin e parashikimeve në sistemin e prokurimit elektronik dhe publikimi i tij nga APP do të bëhet brenda tre ditëve nga dita e nesërme e krijimit të tij në sistem.

4. Autoriteti kontraktor, ka të drejtë të bëjë ndryshime në regjistrin e parashikimeve të procedurave të prokurimit, vetëm në raste të justifikuara.

Çdo ndryshim i regjistrit të parashikimeve bëhet nga vetë autoriteti kontraktor, në sistemin e prokurimit elektronik dhe publikimi i tij nga APP do të bëhet brenda tre ditëve nga dita e nesërme e punës e krijimit të tij në sistem.

APP nuk do të lejojë publikimin e ndryshimit të regjistrave të parashikimeve, nëse konstaton se ky ndryshim nuk është bërë në përputhje me kërkesat e legjislacionit të prokurimit publik.

Një kopje e këtyre ndryshimeve duhet t'i dërgohet edhe Drejtorisë së Buxhetit dhe Thesarit në Ministrinë e Financave dhe institucionit qendror, në rastin kur ka një të tillë”.

#### Neni 4

Në nenin 6 “Publikimi i njoftimit të fituesit, njoftimit të kontratës së lidhur dhe njoftimit të anulimit”, bëhen këto shtesa dhe ndryshime:

1. Pas pikës 3, shtohet pika 3/1 me këtë përmbajtje:

“3.1 Në rastin e delegimit të prokurimit, autoriteti/et kontraktor/e përfituese duhet të dërgojnë njoftimin e kontratës së lidhur pranë autoritetit kontraktor, i cili ka zhvilluar procedurën e prokurimit, jo më vonë se 5 (pesë) ditë pas nënshkrimit të kontratës. Ky i fundit dërgon për publikim në Buletinin e Njoftimeve Publike njoftimin e kontratës së lidhur, jo më vonë se 5 (pesë) ditë pas marrjes së këtij njoftimi nga autoriteti kontraktor”.

2. Në pikën 6, në fjalinë e parë, pas fjalëve “... hedhja në sistemin elektronik të njoftimit të fituesit,” shtohen fjalët “njoftimi i anulimit”, si dhe në fjalinë e dytë pas fjalëve “Shpallja e njoftimit të fituesit” shtohen fjalët “njoftimi i anulimit”.

#### Neni 5

Neni 7 “Raporti i realizimeve të prokurimit publik” riformulohet me këtë përmbajtje:

“Neni 7

Realizimi i procedurave të prokurimit

1. Autoriteti kontraktor, në përfundim të çdo procedure prokurimi, pas lidhjes së kontratës e pasqyron këtë procedurë në regjistrin e realizimeve të procedurave të prokurimit publik, në përputhje me formën dhe metodën e përcaktuar në udhëzimet e APP-së.

2. Autoriteti kontraktor, çdo katër muaj, por jo më vonë se datat 10 maj, 10 shtator dhe 10 janar të çdo viti, dorëzon në organet qendrore, që vënë në dispozicion fondet, një informacion të hollësishëm për procedurat e prokurimit të realizuara.

Çdo katër muaj, APP-ja duhet të dorëzojë në Këshillin e Ministrave një përmbledhje të procedurave të prokurimeve të realizuara në shkallë kombëtare.

3. Autoriteti kontraktor, në fillim të çdo viti, përgatit një regjistër të procedurave të prokurimit të kryera gjatë vitit paraardhës, në përputhje me formën dhe metodën e përcaktuar nga APP-ja. Një kopje e regjistrit u dorëzohet organeve qendrore, që vënë në dispozicion fonde, jo më vonë se data 15 janar.

APP publikon regjistrin kombëtar të procedurave të prokurimit publik të realizuara për vitin paraardhës, brenda datës 20 janar.

4. Çdo organ qendror blerës, në përfundim të çdo procedure prokurimi, pas lidhjes së kontratës e pasqyron këtë procedurë në regjistrin e procedurave të prokurimit të realizuara, në përputhje me formën dhe metodën e përcaktuar në udhëzimet e APP-së”.

## Neni 6

Në nenin 8 “Kufijtë monetarë”, bëhen këto ndryshime:

1. Pika 2 riformulohet me këtë përmbajtje:

“2. Për prokurimet, vlera e përlllogaritur e të cilave, brenda një viti kalendarik, është nga 100,000 (njëqindmijë) lekë deri në 800.000 (tetëqind mijë) lekë, autoriteti kontraktor mund të përdorë procedurën për prokurim me vlerë të vogël, siç përshkruhet në nenin 40 të këtyre rregullave.

Për objektet, ku përfshihen mallra dhe shërbime të ngjashme, vlera e përlllogaritur e të cilave, brenda një viti kalendarik, nuk është më e madhe se 100,000

(njëqindmijë) lekë, autoriteti kontraktor nuk i nënshtrohet procedurave të prokurimit.

Në çdo rast, pavarësisht faktit që nuk do të prokurohen, planifikimi i këtyre objekteve dhe vlerat përkatëse duhet të pasqyrohen respektivisht në regjistrin e parashikimeve dhe në regjistrin e realizimeve të procedurave të prokurimit publik.

Pagesat për këto objekte bëhen sipas legjislacionit tatimor në fuqi dhe faturat e lëshuara në këto raste kanë vlerën e kontratës së lidhur, kur palët nuk kanë nënshkruar një të tillë.

2. Pika 3 riformulohet me këtë përmbajtje:

“3. Për veprimtari të përcaktuara në ceremonialin zyrtar të Republikës së Shqipërisë, si dhe për artikuj dhe shërbime protokollare që i shërbejnë veprimtarisë së përditshme të autoriteteve kontraktore, sipas legjislacionit në fuqi, vlera e përlllogaritur e prokurimeve me vlerë të vogël për artikuj apo grup - artikujsh brenda një viti kalendarik, është nën vlerën e kufirit të ulët monetar”.

#### Neni 7

Në pikën 2 të nenit 11 “Përmbajtja e dokumentave standarde të tenderit”, pas fjalëve “... formularin për deklarin e konfliktit të interesit;” shtohen fjalët “formulari i informacionit konfidencial;”, si dhe pas fjalëve “njoftimin e kontratës së lidhur” shtohen fjalët “njoftim i anulimit të procedurës”.

#### Neni 8

Në nenin 12 “Njoftimi i kontratës”, në fund shtohet një paragraf me këtë përmbajtje:

”Në rastet e procedurave të prokurimit të rishpallura pas anulimit, njoftimi i kontratës duhet të përmbajë të dhënat identifikuese të procedurës së anuluar, si numri i referencës në sistemin e prokurimit elektronik, objektin dhe fondin limit”.

#### Neni 9

Në nenin 14 “Udhëzimet për ofertuesit/kandidatët” bëhen këto shtesa dhe ndryshime:

1. Fjalja e parë e pikës 2 riformulohet me këtë përmbajtje:

“Në rastin e procedurave të prokurimit mbi kufijtë e lartë monetarë, dokumentet e tenderit duhet të hartohen në gjuhët shqip dhe anglisht. Operatorët ekonomikë mund të paraqesin ofertat e tyre në gjuhët shqip ose anglisht”.

2. Fjalja e parë e pikës 3 riformulohet me këtë përmbajtje:

“Në udhëzime duhet të përcaktohet që, nëse autoriteti kontraktor vlerëson të nevojshme një vizitë në terren/objekt, atëherë të gjithë operatorët ekonomikë të interesuar për të marrë pjesë në tender duhet të kenë mundësi të barabarta për të vëzhguar terrenin e punës/ekzekutimit”.

3. Paragrafi i dytë i pikës 6 riformulohet me këtë përmbajtje:

“Nëse pas datës së dorëzimit të ofertave ose datës së nënshkrimit të kontratës, ndonjë ligj, ose akt nënligjor - në Republikën e Shqipërisë hyn në fuqi ose ndryshon dhe ndikon kushtet, duke përfshirë datën e dorëzimit ose çmimin e kontratës, kushtet ose çmimi i kontratës do të rregullohen në atë masë sa kontraktuesi është ndikuar në përmbushjen e detyrimeve të tij sipas kontratës”.

4. Pas pikës 6 shtohet pika 7 me këtë përmbajtje:

“7. Periudha e vlefshmërisë së ofertës fillon që nga momenti i hapjes së ofertave. Në çdo rast, të paktën pesë ditë përpara përfundimit të afatit kohor për vlefshmërinë e ofertave, autoriteti kontraktor mund t'i kërkojë ofertuesit me shkrim, të zgjasë periudhën e vlefshmërisë, deri në një datë të caktuar. Ofertuesi mund t'a refuzojë këtë kërkesë me shkrim pa humbur të drejtën për rimbursim të sigurimit të ofertës, kur ka një tillë. Ofertuesi që bie dakord të zgjasë periudhën e vlefshmërisë së ofertës njofton autoritetin kontraktor me shkrim, dhe paraqet një sigurim oferte të zgjatur, nëse ka pasur një të tillë. Oferta nuk mund të modifikohet. Nëse ofertuesi nuk i përgjigjet kërkesës së autoritetit kontraktor lidhur me zgjatjen e periudhës së vlefshmërisë së ofertës, ose nuk e pranon kërkesën në fjalë, ose nuk paraqet një sigurim të zgjatur të ofertës, kur kërkohet, atëherë autoriteti kontraktor do të refuzojë ofertën.

Nëse procedura e prokurimit është e pezulluar, koha e pezullimit nuk llogaritet në periudhën e vlefshmërisë së ofertës”

## Neni 10

Neni 15 “Kriteret e përgjithshme të kualifikimit/pjesëmarrjes riformulohet me këtë përmbajtje:

“Përmbushja e kriterëve të përgjithshme të kualifikimit/pjesëmarrjes, sipas parashikimeve të nenit 45 të LPP realizohet nëpërmjet paraqitjes së një vetëdeklarate me shkrim nga ana e kandidatit ose ofertuesit, Vetëdeklarimi bëhet nën përgjegjësinë e plotë të kandidatit ose ofertuesit.

Në rast se, ka dyshime mbi vërtetësinë e këtij deklarimi, autoriteti kontraktor ka të drejtë të kryejë verifikimet e nevojshme”.

## Neni 10

Në nenin 16 “Deklarimi i konfliktit të interesit” bëhen këto shtesa dhe ndryshime:

1. Emërtimi i nenit riformulohet me këtë përmbajtje:

“Deklarimi i konfliktit të interesit dhe informacioni konfidencial”.

2. Pas pikës 1 shtohet pika 2 me këtë përmbajtje:

“2. Nëpërmjet listës së informacionit konfidencial, kandidati/ofertuesi deklaron informacionin që kërkon të mbahet konfidencial”.

## Neni 11

Në nenin 18 “Sigurimi i ofertës”, në pikën 1 shtohet një fjali me këtë përmbajtje:

“Sigurimi i ofertës nuk kërkohet në procedurat e prokurimit me vlerë më të ulët se kufiri i lartë monetar”.

## Neni 12

Pas nenit 25 shtohet neni 25/1 si vijon:

“Neni 25/1

Njoftimi i anulimit



1. Autoriteti kontraktor dërgon për publikim njoftimin e anulimit brenda 5 ditëve nga marrja e vendimit të anulimit.

2. Njoftimi duhet të përmbajë:

- numrin e referencës së procedurës dhe emrin e autoritetit kontraktor;
  - përshkrimin e punëve/mallrave/shërbimeve;
- arsyet e anulimit të procedurës sipas përcaktimeve të nenit 24 të LPP-së”.

### Neni 13

Në nenin 26 “Kontratat për punë publike” bëhen këto shtesa dhe ndryshime:

1. Në pikën 7, gërma “b” riformulohet me këtë përmbajtje:

b) kopje të deklaratave të xhiros vjetore. Në procedurat e prokurimit me vlerë nën kufirin e ulët monetar, vlera e kërkuar nga autoriteti kontraktor nuk mund të tejkalojë vlerën limit të kontratës që prokurohet. Në procedurat e prokurimit me vlerë mbi kufirin e ulët monetar, vlera e kërkuar nga autoriteti kontraktor nuk mund të tejkalojë 50 % të vlerës limit të kontratës që prokurohet; dhe/ose”.

2. Në pikën 8, bëhen këto shtesa dhe ndryshime:

a) Pas gërmës”c” shtohen gërmat ”ç” dhe ”d” si vijon:

ç) Vetdeklarim nga operatori ekonomikë që nuk është fitues dhe/apo kanë në proces, në të njëjtën kohë, si kontraktorë/nëkontraktorë, një investim/investime, sipas një kontrate apo kontratave të lidhura a në proces për t'u lidhur, sipas LPP, i cili në çastin e hapjes së ofertave nuk i ka përfunduar punimet fizike, në masën 70 % të vëllimeve të përgjithshme të punës.

Përcaktimi i mësipërm vlen edhe për rastin e bashkimit të operatorëve, ku secili prej tyre, për t'u kualifikuar për punë publike, duhet të ketë përfunduar punimet fizike, në masën 70 % të vëllimeve të përgjithshme të punës, që ai ka marrë përsipër të realizojë në përputhje me kontratën e bashkëpunimit.

Ky kusht nuk do të zbatohet nëse operatorët ekonomikë janë kontraktorë/nëkontraktorë në një investim/investime dhe nuk i kanë përfunduar punimet fizike, në masën 70% të vëllimeve të përgjithshme të punës, për shkaqe të

- përligjura, si vijon:
- i) vonesa si pasojë e ndërthurjes me një vepër tjetër në ndërtim, si KUZ, OSHEE etj;
  - ii) dëmtimi apo dalja në dritë e objekteve me vlera historike;
  - iii) vonesa në shpronësimin e subjekteve, të cilave u përket prona;
  - iv) ndryshim në prioritetet e qeverisjes në financim;
  - v) rishpërndarje të fondeve si pasojë e ndonjë emergjence, të justifikuara nga autoriteti kontraktor, sipas dokumentacionit të lëshuar nga ky i fundit.

Në çdo rast, një vërtetim i tillë nuk do të lëshohet për subjektet nëse, sipas grafikut të punimeve pjesë e kontratës, deri në periudhën në fjalë, ato nuk do të mund të kishin kryer më shumë se 70% të vëllimeve të përgjithshme të punës.

d) Vetdeklarim nga operatori ekonomik që brenda së njëjtës periudhë, nuk është kontraktor/nëkontraktor për kontratë/kontrata të lidhura, me vlerë të përbashkët ose të veçantë, jo më të madhe se 100 % i kufirit maksimal, që disponon kandidati, sipas licencës profesionale, të lëshuar nga autoriteti kompetent. Në kuptim të përcaktimit të mësipërm, fjala "*periudhë*" nënkupton kohëzgjatjen e investimit të kryer sipas LPP nga çasti i shpalljes fitues e deri në kolaudimin e objektit/investimit.

3. Pika 10 shfuqizohet.

#### Neni 14

Në nenin 27 "Kontratat e mallrave", pika 5, gërma "b", riformulohet me këtë përmbajtje:

"Në procedurat e prokurimit me vlerë nën kufirin e ulët monetar, vlera e kërkuar nga autoriteti kontraktor nuk mund të tejkalojë vlerën limit të kontratës që prokurohet. Në procedurat e prokurimit me vlerë mbi kufirin e ulët monetar, vlera e kërkuar nga autoriteti kontraktor nuk mund të tejkalojë 40 % të vlerës limit të kontratës që prokurohet; dhe/ose".

## Neni 15

Në nenin 28 “Kontratat e shërbimeve”, pika 4, gërma “b” riformulohet me këtë përmbajtje:

“Në procedurat e prokurimit me vlerë nën kufirin e ulët monetar, vlera e kërkuar nga autoriteti kontraktor nuk mund të tejkalojë vlerën limit të kontratës që prokurohet. Në procedurat e prokurimit me vlerë mbi kufirin e ulët monetar, vlera e kërkuar nga autoriteti kontraktor nuk mund të tejkalojë 40 % të vlerës limit të kontratës që prokurohet; dhe/ose”.

## Neni 16

Në nenin 29 “Kontrata për punë/mall/shërbim e ndarë në lote” shtohet një paragraf me këtë përmbajtje:

“Në çdo rast, lotet janë të organizuara si procedura të veçanta brenda një procedure. Fillimi dhe përfundimi i njërit lot nuk ndikon në lotin tjetër të procedurës”.

## Neni 17

Në nenin 30 “Kërkesat e cilësisë”, pika 1 riformulohet me këtë përmbajtje:

“1. Autoriteti kontraktor, për të vërtetuar se punët, mallrat ose shërbimet objekt prokurimi i plotësojnë kërkesat e cilësisë, mund t’u kërkojë ofertuesve të paraqesin çertifikata të lëshuara nga një organ i vlerësimit të konformitetit i akredituar nga organizmi kombëtar i akreditimit ose organizma ndërkombëtar akreditues të njohura nga Republika e Shqipërisë.

Kjo dispozitë zbatohet edhe kur kërkesat teknike u referohen kualifikimeve të kandidatit ose të ofertuesit”.

## Neni 18

Në nenin 31 “Kriteret për vlerësimin e ofertës”, në pikën 3, gërma “b”, pas fjalëve “... taksë karboni” shtohen fjalët “si dhe çdo taksë tjetër sipas legjislacionit në fuqi”.

## Neni 19

Në nenin 35 “Procedura me negocim, me shpallje paraprake të njoftimit të kontratës”, pika 2, gërma “a”, riformulohet me këtë përmbajtje:

“Kur në përgjigje të dy procedurave të njëpasnjëshme mbi ose nën kufirin e ulët monetar janë dorëzuar vetëm oferta të pavlefshme. Oferta vlerësohet e pavlefshme nëse nuk është në përputhje me të gjitha kërkesat dhe specifikimet e përcaktuara në njoftimin e kontratës dhe në dokumentat e tenderit. Në çdo rast, pavlefshmëria e ofertave nuk duhet të vijë si shkak i gabimeve të bëra në dokumentat e tenderit dhe/ose për shkak të ndonjë veprimi të autoritetit kontraktor.

Kushtet e kontratës dhe kriteret e veçanta të pranimit, që nuk lidhen përpjestimisht me fondin limit, nuk duhet të ndryshojnë nga ato të procedurës së fundit të anuluar”.

## Neni 20

1. Në nenin 36 “Procedura me negocim, pa shpallje paraprake të njoftimit të kontratës”, në pikën 2 bëhen këto shtesa dhe ndryshime:

a) Në gërmën “c”, fjalia e dytë riformulohet si vijon:

”Në këtë rast, duhet të plotësohen të gjitha kushtet e mëposhtme...”.

b) Në gërmën ”dh” fjalët ”kur zgjaten kontratat...” zëvendësohen me fjalët ”për kontratat”.

c) Në gërmën ”e” fjalët ”... procedurën e hapur ose të kufizuar” zëvendësohen me fjalët ”... procedurën mbi ose nën kufirin e ulët monetar”.

ç. Gërma ”ë” shfuqizohet.

2. Në nenin 36 “Procedura me negocim, pa shpallje paraprake të njoftimit të kontratës”, në fund të pikës 5 shtohet një paragraf me këtë përmbajtje:

“Në rastin kur, autoriteti kontraktor përdor procedurën e prokurimit me negociim pa shpallje paraprake sipas parashikimeve të pikës 2/d, dh, e, të këtij neni, kur kontraktori i fundit është bashkim operatorësh ekonomikë, autoriteti kontraktor duhet të sigurohet që ky bashkim të jetë konfirmuar”.

## Neni 21

### Shërbimet e konsulencës

Në nenin 37 “Shërbimet e konsulencës”, bëhen këto shtesa dhe ndryshime:

1. Në pikën 2 shtohet një paragraf me këtë përmbajtje:

“Në rastin e bashkimit të konsulentëve secili prej tyre duhet të plotësojë kriteret e përgjithshme të pranimit, ndërkohë kriteret e veçanta të pranimit plotësohen bashkarisht nga i gjithë bashkimi”.

2. Pika 3 riformulohet me këtë përmbajtje:

“Autoriteti kontraktor, përveç kriterëve të përcaktuara në LPP, për skualifikimin e kandidatëve ose të ofertuesve duhet të vlerësojnë edhe mbi kushtet e konfliktit të interesit si vijon:

- a) Konfliktin ndërmjet konsulentëve. Konsulentët nuk mund të ofertojnë me të njëjtën përbërje të stafit. Për këtë qëllim, anëtarët e stafit të një konsulenti duhet të vetdeklarojnë disponueshmërinë e tyre për konsulentin dhe mosangazhimin në konsulentë të tjerë ofertues në të njëjtën procedurë.
- b) konfliktin ndërmjet veprimtarive të konsulencës dhe prokurimit të mallrave, punëve ose shërbimeve. Në këtë rast, operatori ekonomik i kontraktuar nga autoriteti kontraktor për mallra, punë ose shërbime për një projekt dhe secili prej anëtarëve të tij duhet të skualifikohet nga ofrimi i shërbimeve të konsulencës që lidhen me këto mallra, punë ose shërbime. Nga ana tjetër, konsulenti i kontraktuar nga autoriteti kontraktor për përgatitjen ose zbatimin e një projekti dhe secili prej anëtarëve të tij duhet të skualifikohet nga furnizimi i mallrave, kryerja e punëve ose shërbimeve (me përjashtim të shërbimeve të konsulencës) që rrjedhin ose janë të lidhura drejtpërdrejt me shërbimet e konsulencës për këtë përgatitje ose zbatim.
- c) konfliktin ndërmjet detyrave të konsulencës. As konsulentët dhe as ndonjëri prej anëtarëve të stafit të tyre nuk duhet të punësohen për kryerjen e ndonjë detyre që për nga natyra e saj mund të jetë në konflikt me një detyrë tjetër të konsulentëve.
- d) marrëdhënien me stafin e autoritetit kontraktor: konsulentët (përfshirë stafin e tyre dhe nënkonsulentët) nuk duhet të kenë marrëdhënie biznesi ose familjare, me një anëtar të stafit të autoritetit kontraktor, drejtpërdrejt ose jo, i përfshirë në ndonjë pjesë të përgatitjes së kushteve të kontratës dhe/ose në procesin e përzgjedhjes për këtë kontratë dhe/ose për mbikëqyrjen e kësaj kontrate.

3. Në pikën 4 bëhen këto shtesa dhe ndryshime:

a) Gërma “b” riformulohet me këtë përmbajtje: “Titullari i autoritetit kontraktor apo personi i autorizuar nxjerr urdhrin e prokurimit, me të njëjtën përmbajtje, siç përcaktohet në nenin 60 të këtyre rregullave.

Titullari i autoritetit kontraktor apo personi i autorizuar nxjerr urdhër për krijimin e komisionit të vlerësimit të ofertave, siç përcaktohet në nenin 58 të këtyre rregullave. Në rastin e shërbimit të konsulencës të gjithë anëtarët e komisionit duhet të jenë ekspertë të fushës së objektit që prokurohet”.

b) Gërma “d”, nëndarja e dytë, tofjalëshi “... me vlerë ndërmjet kufirit të lartë e të ulët monetar” zëvendësohet me togfjalëshin “... me vlerë nën kufirin e lartë monetar”.

c) Gërma “ë”, paragrafi i dytë, në nëndarjen e dytë tofjalëshi “... me vlerë ndërmjet kufirit të lartë e të ulët monetar ...” zëvendësohet me togfjalëshin “... me vlerë nën kufirin e lartë monetar ...”.

4. Gërma “ë”, paragrafi i tretë, “ii” pas nëndarjes ”- transferimin e njohurive, nëse kërkohet” shtohet fjalia me këtë përmbajtje:

“Nëse nuk kërkohet, pikët maksimale të parashikuara për vlerësimin e këtij kriteri duhet t’i shtohen kriterit “kualifikimet e stafit kryesor të propozuar”.

5. Gërma “ë”, në paragrafin e pestë, pas fjalisë “Ky proces regjistrohet nëpërmjet procesverbalit të mbajtur për këtë qëllim”, shtohet fjalia me këtë përmbajtje:

“Secili prej anëtarëve të komisionit të vlerësimit të ofertave duhet të shpjegojë në detaje vlerësimin e tij”.

## Neni 22

Në nenin 40 “Procedurat e prokurimit me vlerë të vogël”, bëhen këto ndryshime:

1. Në pikën 1, fjalia e dytë hiqen fjalët “... në fillim të vitit...”.

2. Në pikën 2, fjalia e dytë, hiqet.

3. Pika 3 riformulohet me këtë përmbajtje:

“3. Kur lind nevoja për punë, mallra ose shërbime, titullari i autoritetit kontraktor ose një zyrtar tjetër i autorizuar nxjerr urdhrin e prokurimit ku përcaktohen objekti i prokurimit dhe sasia e tyre.

Në çdo rast, përpara nxjerrjes së urdhrin të prokurimit nga titullari i autoritetit kontraktor ose personi i autorizuar prej tij, komisioni i prokurimit me vlerë të vogël duhet të përlllogarisë fondin për sasinë e mallrave, shërbimeve, punëve që do të prokurojë, nëse kjo detyrë nuk i është ngarkuar paraprakisht një strukture të posaçme.

Urdhri i prokurimit duhet të shoqërohet me ftesën për ofertë, që u drejtohet operatorëve ekonomikë, në të cilën përcaktohen të gjitha të dhënat e nevojshme që lidhen me objektin e prokurimit”.

4. Pika 4 shfuqizohet.

5. Pika 5 riformulohet me këtë përmbajtje:

“Në rastin kur procedura e prokurimit me vlerë të vogël kryhet me mjete elektronike, anëtarët e komisionit ftojnë të paktën 5 (pesë) operatorë ekonomikë, kur është e mundur, si dhe publikojnë ftesën për ofertë për çdo të interesuar, në sistemin e prokurimit elektronik.

Në çdo rast, ofertuesi i renditur në vend të parë duhet t’i përgjigjet autoritetit kontraktor, brenda afatit të përcaktuar nga ky i fundit në ftesën për ofertë.

Në rast të pamundësisë së realizimit të objektit të prokurimit, ofertuesi i renditur në vend të parë, duhet të njoftojë autoritetin kontraktor brenda afatit të përcaktuar në ftesën për ofertë. Në njoftim duhet të jepen arsyet, që kanë shkaktuar pamundësinë e realizimit të objektit. Autoriteti kontraktor mund të refuzojë ofertën e paraqitur nga një operator ekonomik, i cili në një procedurë të mëparshme prokurimi me vlerë të vogël të zhvilluar nga ky autoritet gjatë këtij viti, nuk e ka njoftuar brenda afatit kohor të përcaktuar në ftesën për ofertë mbi arsyet që kanë çuar në pamundësinë e realizimit të objektit të prokurimit.

Kur ofertuesi i renditur në vend të parë tërhiqet nga oferta e tij ose nuk plotëson kërkesat e autoritetit kontraktor, ky i fundit përzgjedh ofertuesin e renditur i dyti në listën e ofertave dhe kështu me radhë, deri në ofertuesin e renditur në vend të dhjetë.

Këto veprime duhet të dokumentohen nga komisioni i prokurimit me vlerë të vogël nëpërmjet një procesverbali të mbajtur për këtë qëllim. Në çdo rast, autoriteti kontraktor do të marrë në konsideratë për realizimin e objektit të kontratës vetëm operatorët ekonomikë të renditur deri në vendin e dhjetë të klasifikimit.

Afati i fundit për pranimin dhe hapjen e ofertave nuk duhet të jetë ditë pushimi (e shtunë, e dielë, festa zyrtare).

Duke qenë se, procedurat e prokurimit me vlerë të vogël janë procedura të thjeshtuara, për këto procedura nuk zbatohen dispozitat e nenit 56 të LPP, për ofertat anomalisht të ulëta dhe dispozitat e nenit 63 të LPP, për ankimin administrativ.

Kryerja e procedurës me mjete elektronike do të bëhet sipas udhëzimeve të APP-së”.

6. Pikat 6 dhe 7, shfuqizohen.

#### Neni 23

Pas nenit 40 shtohet neni 40/1 si vijon:

“Neni 40/1

Sistemi dinamik i blerjes

Sistemi dinamik i blerjes është një sistem tërësisht elektronik që mund të përdoret për blerje të përsëritura të standardizuara. Ky sistem është i hapur për të gjithë operatorët ekonomikë, që regjistrohen në sistemin e prokurimit elektronik dhe operojnë në fushën e aktivitetit të objektit që prokurohet.

Autoriteti kontraktor përdor sistem të thjeshtuar të blerjes dinamike për blerjen e biletave të transportit ajror ndërkombëtar, në përputhje me udhëzimet e APP-së”.

#### Neni 24



Në nenin 42 “Marrëveshja kuadër”, pika 1, pas gërmës “c” shtohet gërma “d” me këtë përmbajtje:

“d) një autoriteti kontraktor dhe një operatori ekonomik”.

#### Neni 25

Neni 43 “Qëllimi” riformulohet me këtë përmbajtje:

“Një marrëveshje kuadër është e përshtatshme për mallra dhe shërbime të përdorura zakonisht me natyrë të përsëritur dhe/ose, kur është e vështirë ose e pamundur për të përcaktuar paraprakisht volumet që duhet të prokurohen, dhe nuk ka siguri për kohën e dorëzimeve/realizimeve dhe të ekzekutimit të kontratave.

Ndryshimi ndërmjet një marrëveshjeje kuadër dhe kontratave të tjera që lidhen sipas procedurave të prokurimit të parashikuara në LPP është se kushtet e mallrave/shërbimeve/punëve, që do të prokurohen, nuk janë të përcaktuara në një marrëveshje kuadër. Autoritetet kontraktore mund të blejnë vetëm për të plotësuar nevojat e tyre dhe jo për nevoja të autoriteteve kontraktore që nuk janë pjesë në marrëveshjen kuadër”.

#### Neni 26

Në nenin 45 “Prokurimi i marrëveshjes kuadër”, pika 2, riformulohet me këtë përmbajtje:

“Operatorët ekonomikë përzgjidhen si palë të marrëveshjes kuadër duke zbatuar kriteret e përcaktimit të ofertës fituese, sipas përcaktimeve të nenit 55 të LPP. Në çdo rast, autoriteti kontraktor mund të vendosë të vlerësojë ofertën/ofertat fituese duke u bazuar në çmimin për njësi”.

#### Neni 27

Pas nenit 45 shtohet neni 45/1, si vijon:

“Neni 45/1

Përlllogaritja e vlerës së marrëveshjes kuadër

“1. Vlera e parashikuar e një marrëveshje kuadër duhet të përfshijë shumën e përllogaritur të të gjitha vlerave të kontratave, që parashikohen të jepen gjatë kohës së vlefshmërisë së marrëveshjes kuadër.

2. Në rastin kur autoriteti kontraktor e ka të pamundur të përcaktojë sasinë e objektit të prokurimit, për efekt të përllogaritjes së vlerës së marrëveshjes kuadër, duhet t’i referohet për aq sa është e mundur, nevojave të planifikuara dhe/ose nevojave të mëparshme për këtë objekt. Në çdo rast, përllogaritja e nevojave, duhet të jetë sa më e plotë dhe gjithëpërfshirëse, me qëllim shmangien e situatave kur dalin nevoja të reja, për të njëjtin objekt, të papërfshira në marrëveshjen kuadër”.

#### Neni 28

Në nenin 47 “Llojet e marrëveshjes kuadër”, në pikën 4, pas paragrafit të pestë shtohen dy paragrafë me këtë përmbajtje:

“Forma e komunikimit përzgjidhet nga autoriteti kontraktor, në varësi të kohës në dispozicion për përmbushjen e nevojës. Autoriteti kontraktor është përgjegjës për të ruajtur konfidencialitetin e përmbajtjes së ofertave, deri në vlerësimin përfundimtar të tyre.

Në çdo rast, autoriteti kontraktor duhet t’u dërgojë në të njëjtën kohë, ftesën për ofertë të gjithë operatorëve ekonomikë, palë të marrëveshjes kuadër”.

#### Neni 29

Pas nenit 47 shtohen nenet 47/1 dhe 47/2 si vijon:

“Neni 47/1

Dhënia e kontratave sipas marrëveshjes kuadër

1. Kontratat mund të jepen mbi bazën e marrëveshjes kuadër përgjatë gjithë kohës së vlefshmërisë së saj. Periudha e vlefshmërisë së kontratave të lidhura mbi bazën e një marrëveshje kuadër mund të kalojë periudhën e vlefshmërisë së marrëveshjes kuadër.

2. Në rastin e marrëveshjes kuadër ku jo të gjitha kushtet janë të përcaktuara, gjatë rihapjes së konkurrimit autoriteti kontraktor është i detyruar të krijojë një komision vlerësimi për dhënien e një kontrate në bazë të marrëveshjes kuadër.

Përbërja e komisionit nuk është e nevojshme të jetë e njëjtë me atë të komisionit të vlerësimit të ofertave, të përcaktuar për kryerjen e procedurës së prokurimit për marrëveshjen kuadër.

3. Dhënia e kontratave në bazë të një marrëveshje kuadër të realizuar nga një autoritet kontraktor në cilësinë e organit qendror blerës do të bëhet nga vetë autoritetet kontraktore përfituese.

Njoftimi i kontratave të lidhura gjatë një viti kalendarik, do të dërgohet nga autoriteti kontraktor përfitues, në Agjencinë e Prokurimit Publik për publikim në Buletinin e Njoftimeve Publike, në formë të shkruar dhe elektronike (CD), jo më vonë se data 10 janar e vitit në vijim.

4. Sasitë e parashikuara janë vetëm “sasi orientuese”. Autoriteti kontraktor mundet të blejë më pak ose më shumë se sasitë e parashikuara (por në çdo rast brenda vlerës së përlogaritur të marrëveshjes kuadër).

5. Operatori ekonomik që është palë në një marrëveshje kuadër, nuk mund të formojë një bashkim operatorësh ekonomikë dhe të paraqesë ofertë për një kontratë, pasi është bërë palë e kësaj marrëveshje kuadër.

6. Operatori ekonomik që është palë në një marrëveshje kuadër, nuk mund të caktohet si nënkontraktor i një operatori ekonomik tjetër që i është dhënë kontrata sipas të njëjtës marrëveshje kuadër.

7. Nëse një operator ekonomik, palë në marrëveshjen kuadër nuk përmbush më kriteret e kualifikimit, për të cilat është shpallur fitues në këtë marrëveshje, është i detyruar të njoftojë autoritetin kontraktor menjëherë, por jo më vonë se 15 ditë nga momenti i ndodhjes së një ndryshimi të tillë.

Në rast se autoriteti kontraktor konstaton mospërmbushjen e këtij detyrimi, duhet të veprojë konform nenit 47 të LPP”.

Neni 47/2

Ndryshimi në numër i palëve të marrëveshjes kuadër

Nëse para mbarimit të marrëveshjes kuadër të nënshkruar me disa operatorë ekonomikë, palë në marrëveshjen kuadër mbetet vetëm një operator ekonomik, autoriteti kontraktor nuk duhet të japë kontrata sipas kësaj marrëveshje kuadër.

Kur lind një situatë e tillë, autoriteti kontraktor është i detyruar të njoftojë menjëherë operatorin ekonomik të mbetur në marrëveshjen kuadër. Vlefshmëria dhe efektiviteti i marrëveshjes kuadër pushon së ekzistuari me këtë njoftim.

Në rast se, një operator ekonomik nuk i përgjigjet dy herë radhazi ftesës së autoritetit kontraktor gjatë rihapjes së konkurimit, ky operator nuk do të jetë më palë e marrëveshjes kuadër”.

Neni 30

Në nenin 56 “Titullari i autoritetit kontraktor”, në paragrafin e dytë shtohet fjalia “... Çdo nëpunës, që merr pjesë në procesin e prokurimit, nënshkruan një deklaratë përmes së cilës deklaron se nuk ndodhet në kushtet e konfliktit të interesit”.

Neni 31

Neni 57 “Njësia e prokurimit” riformulohet si vijon:

“Personi përgjegjës për prokurimin dhe njësia e prokurimit

1. Titullari i autoritetit kontraktor, në fillim të vitit, cakton me urdhër të veçantë, personin/persoant përgjegjës për prokurimin, dhe dërgon emrin/emrat respektivë në Agjencinë e Prokurimit Publik.

Personi përgjegjës për prokurimin duhet të administrojë në mënyrë të vazhdueshme procesin e prokurimit.

Në varësi të numrit të procedurave të prokurimit të parashikuara për t’u zhvilluar, autoriteti kontraktor mund të caktojë më shumë se një person përgjegjës për prokurimin.

Personi/at përgjegjës për prokurimin duhet të jetë jurist.

2. Për çdo procedurë prokurimi, në varësi të specifikës së objektit të prokurimit, titullari i autoritetit kontraktor krijon Njësinë e Prokurimit, në përbërje të së cilës është personi përgjegjës për prokurimin, i caktuar në fillim të vitit dhe të paktën një specialist fushe ose me njohuri për objektin e prokurimit.

Në rast mungese personeli, autoriteti kontraktor mund të kërkojë staf të specializuar nga autoritete të tjera kontraktore ose të punësojë ekspertë të jashtëm.

Përveç sa më sipër, autoriteti kontraktor mund të krijojë një njësi të përbashkët prokurimi me një apo më shumë autoritete kontraktore

3. Personi përgjegjës për prokurimin kryen detyrat e mëposhtme:

- sigurimin e të dhënave të nevojshme nga strukturat përkatëse në institucion dhe përgatitjen e regjistrit të parashikimit dhe regjistrit të realizimit të procedurave të prokurimit publik;
- përzgjedhjen e llojit të procedurës së prokurimit (dhe justifikimin kur është rasti) kur kjo nuk bëhet nga struktura të tjera të posaçme;
- hartimin e urdhrit të prokurimit;
- përgatitjen e dokumenteve të tenderit dhe mbledhjen e të gjitha materialeve të nevojshme, që u bashkëlidhen atyre;
- hartimin dhe dërgimin e njoftimeve për publikim, brenda afateve kohore;
- hartimin dhe dërgimin e ftesave për pjesëmarrje, kandidatëve të ftuar në një procedurë prokurimi, duke argumentuar përzgjedhjen e tyre;
- administrimin e të gjitha procesverbaleve për dokumentet e tenderit dhe çdo dokument tjetër, që lidhet me procedurat e përcaktimit të fituesit, duke përfshirë edhe procesverbalet e mbledhjeve, kur është rasti;
- llogaritjen e çmimeve të shitjes së dokumenteve të tenderit që u jepen operatorëve ekonomikë me kërkesë të tyre, kur është rasti;
- në kuadër të hartimit të dokumentave të tenderit bashkërendon punën me APP, me qëllim realizimin e kësaj detyre me efikasitetit dhe në përputhje me legjislacionin e fushës në fuqi;

- administrimin e dokumentacionit në formë të shkruar, origjinal ose fotokopje të noterizuar të operatorit ekonomik fitues, përpara lidhjes së kontratës nga autoriteti kontraktor;
- administrimin e sigurimit të kontratës përpara lidhjes së kontratës nga autoriteti kontraktor;
- përcjellja pranë APP-së, e raportimeve mbi ecurinë e zbatimit të kontratës, në rastet kur kërkohet, si dhe e raportimit përfundimtar të ekzekutimit të kontratës.

4. Specialisti i fushës ose personi me njohuri për objektin që prokurohet, anëtarë të Njësisë së Prokurimit, kryejnë detyrat e mëposhtme:

- hartimin e specifikimeve teknike;
- përlllogaritjen e fondit limit, nëse kjo detyrë nuk i është ngarkuar një strukture të posaçme;
- hartimin e kritereve të veçanta të pranimit, lidhur me kapacitetin teknik;
- hartimin e kritereve të vlerësimit, nëse është rasti;
- përcaktimin e çdo informacioni tjetër specifik të nevojshëm për objektin e prokurimit (si psh: grafiku i lëvrimit).

#### Neni 32

Në nenin 58 “Komisioni i vlerësimit të ofertave”, paragrafi i parë riformulohet me këtë përmbajtje:

”Komisioni i vlerësimit të ofertave emërohet me urdhër të veçantë të titullarit të autoritetit kontraktor dhe përbëhet nga jo më pak se 3 persona me arsim të lartë, ku të paktën njëri është ekspert i fushës. Personat përgjegjës për hartimin e dokumenteve të tenderit nuk mund të emërohen anëtarë të komisionit të vlerësimit të ofertave. Kryetari i komisionit është përgjegjës për organizimin dhe drejtimin e punës së Komisionit në përputhje me detyrat e përcaktuara në këto rregulla. Në çdo rast, numri i anëtarëve duhet të jetë tek”.

#### Neni 33

Në nenin 59 “Përlllogaritja e vlerës limit të kontratës”, në pikën 2 bëhen këto ndryshime:

1. Në gërmën “ç” fjalët “të botuara” zëvendësohen me fjalët “të shpallura publikisht”.

2. Fjalja e fundit riformulohet me këtë përmbajtje:

“Autoriteti kontraktor, përpara nxjerrjes së urdhrin të prokurimit, duhet të argumentojë dhe dokumentojë përlllogaritjen e vlerës së kontratës, bazuar në specifikimet teknike të objektit që prokurohet”.

#### Neni 34

Neni 60 “Urdhri i prokurimit”, riformulohet si vijon:

“Kur ka nevojë për punë/mallra/shërbime, pas përlllogaritjes së fondit limit sipas nenit 59 të këtyre rregullave, titullari i autoritetit kontraktor apo zyrtari i autorizuar nxjerr menjëherë urdhrin e prokurimit, i cili duhet të përmbajë:

- objektin e prokurimit;
- fondin e përlllogaritur të vitit buxhetor, si dhe fondin total të përlllogaritur, në rastin e kontratave shumëvjeçare dhe marrëveshjes kuadër;
- llojin e procedurës së prokurimit, arsyet e përdorimit të saj ose mënyrën e prokurimit (nëse është rasti);
- emrat e anëtarëve të njësisë së prokurimit”.

#### Neni 35

Në nenin 61 ”Hartimi dhe publikimi i dokumentave të tenderit”, pikat 2 dhe 3 riformulohen me këtë përmbajtje:

”2. Hartimi i kërkesave të veçanta për kualifikim, që lidhen me kapacitetin teknik, specifikimet teknike, kriteret e vlerësimit (nëse është rasti) dhe çdo informacion tjetër specifik i nevojshëm, bëhet nga specialisti i fushës ose personi me njohuri për objektin e prokurimit, anëtarë të njësisë së prokurimit.

Në çdo rast, hartimi i tyre duhet të argumentohet teknikisht dhe ligjërisht, si dhe të dokumentohet në një procesverbal të mbajtur nga personat e ngarkuar për përgatitjen e tyre. Ky procesverbal i vihet në dispozicion personit përgjegjës për prokurimin, i cili e bën pjesë të dosjes së tenderit.

Seti përfundimtar i dokumentave të tenderit nënshkruhet në çdo faqe nga personi përgjegjës për prokurimin.

Nëse gjatë hartimit të dokumentave të tenderit, përpara publikimit të një procedure prokurimi, njësia e prokurimit ka nevojë për asistencë, komunikon me APP, për të marrë një mendim të specializuar.

Me qëllim dhënien e asistencës, ngritjen e kapaciteteve dhe sigurimin e mirëzbatimit të legjislacionit të prokurimit publik, APP në koordinim me personat përgjegjës për prokurimin mund të asistojë këto të fundit gjatë përgatitjes të dokumentave të tenderit në përputhje me dokumentat standard të tenderit dhe rregullat e prokurimit publik.

Për efekt shpejtësie, komunikimi me APP për koordinimin e veprimtarisë gjatë hartimit të dokumentave të tenderit dhe marrjes së asistencës, mund të bëhet me mjete elektronike (me e-mail).

Afatet dhe procedura e detajuar e koordinimit të veprimtarisë së njësisë të prokurimit me APP në funksion të marrjes së asistencës dhe ngritjes së kapaciteteve, rregullohen me Udhëzim të APP-së.

3. Pas nënshkrimit të njoftimit të kontratës nga titullari i autoritetit kontraktor apo zyrtari i autorizuar, personi përgjegjës për prokurimin dërgon dokumentat e tenderit për publikim, në përputhje me nenet 38 e 39 të LPP”.

## Neni 36

Në nenin 65 “Ndërhyrja në ofertë”, fjalia e parë riformulohet me këtë përmbajtje:

“Asnjë ofertues nuk mund të marrë pjesë në ofertën e dikujt tjetër për të njëjtën procedurë prokurimi”.



## Neni 37

Në nenin 66 “Shqyrtimi dhe vlerësimi i ofertave”, bëhen këto ndryshime:

1. Në pikën 2, në fjalinë e parë pas fjalës “... procedurës” shtohen fjalët “së vlerësimit...”.

2. Në pikën 4, në paragrafin e parë, nënndarja e dytë, fjalia e dytë riformulohet me këtë përmbajtje:

“Ofertat me gabime aritmetike refuzohen, kur shumat absolute të të gjitha korigjimeve janë më shumë se  $\pm 2\%$  e vlerës së ofertës ekonomike të ofruar”.

3. Në pikën 8 shtohet një fjali me këtë përmbajtje:

“Mospjesëmarrja e ofertuesve gjatë procesit të hedhjes së shortit nuk përbën shkak për skualifikim”.

## Neni 38

Neni 68 “Raporti përmbledhës”, riformulohet si vijon:

”Komisioni i vlerësimit të ofertave, pas përfundimit të afateve të ankimit, përgatit një raport përmbledhës për procesin e shqyrtimit dhe vlerësimit të ofertave dhe ia dërgon për miratim titullarit të autoritetit kontraktor.

Raporti përmbledhës duhet të përmbajë: objektin e prokurimit; përshkrimin e punëve/mallrave/shërbimeve; respektimi i kërkesave ligjore në procesin e hapjes së ofertave; çmimet/vlerën e ofertuesve pjesëmarrës; korigjimin e gabimeve aritmetike dhe ofertat anomalisht të ulëta (nëse ka pasur të tilla); ofertuesit e skualifikuar dhe arsyet e skualifikimit; ofertuesit e kualifikuar; ofertuesin e renditur të parin; informacion nëse ka pasur ankesa dhe vendimmarrja në lidhje me to, si dhe çdo informacion tjetër a korrespondencë që lidhet me vlerësimin e ofertave”.

## Neni 39

Neni 73 “Mungesa e konkurrencës”, riformulohet si vijon:

“1. Që të vazhdojë procesi i përzgjedhjes së fituesit në një procedurë prokurimi, duhet të pranohet të paktën 1 (një) ofertë e vlefshme. Në të kundërt, autoriteti kontraktor anulon procedurën e prokurimit.

2. Autoriteti kontraktor, përpara se të fillojë një procedurë të re, analizon shkaqet që shkaktuan dështimin e procedurës dhe nëse është rasti i korrigjon ato në mënyrë që të bëjë të mundur rritjen e konkurrencës. Ky proces dokumentohet në një procesverbal të mbajtur për këtë qëllim”.

#### Neni 40

Në nenin 76 “Kohëzgjatja e kontratës”, bëhen këto ndryshime:

1. Në pikën 1, në fjalinë e pare, fjalët “... kontrata shtesë, në përputhje me shkronjën “b”, të pikave 3 e 5, të nenit 33 të LPP” zëvendësohen me fjalët “... kontrata shumëvjeçare”.

2. Pas pikës 3 shtohet pika 4 me këtë përmbajtje:

“4. Autoritetet kontraktore, për plotësimin e nevojave me mallra dhe shërbime të vazhdueshme, në fillim të çdo viti, lejohen të zgjasin afatin e kontratave fillestare, nëpërmjet nënshkrimit të një kontrate shtesë me të njëjtin kontraktues, deri sa të kryhen procedurat e prokurimit. Në çdo rast, autoriteti kontraktor duhet të argumentojë në mënyrë të detajuar nevojën për zgjatjen e kontratës.

Kontrata shtesë, për mallrat apo shërbimet e vazhdueshme mund të bëhet deri në një vlerë maksimumi 20% të kontratës fillestare dhe fondet për këtë kontratë do të përballohen nga fondet e vëna në dispozicion të autoritetit kontraktor në buxhetin e

Në çdo rast, edhe pse nuk realizohen me procedurë prokurimi, planifikimi dhe realizimi i këtyre kontratave shtesë, me vlerat përkatëse duhet të pasqyrohen në regjistrat e parashikimeve dhe realizimeve të procedurave të prokurimit publik”.

#### Neni 41

Në nenin 77 “Mbikqyrja e kontratës”, bëhen këto ndryshime:

1. Pika 1 riformulohet me këtë përmbajtje;

“1. Gjatë zbatimit të kontratës, autoriteti kontraktor dhe organe të tjera shtetërore, të autorizuar me ligj, (nëse është rasti) mbikëqyrin veprimtarinë e kontraktorit, sipas kërkesave të përcaktuara në dokumentet e tenderit dhe legjislacionin në fuqi”.

2. Në pikën 2, në fjalinë e dytë fjalët “... përfundimi i saj...” zëvendësohen me fjalët “... përfundimi i afatit të zbatimit të saj...”.

3. Pikat 4, 5 dhe 6 riformulohen me këtë përmbajtje:

“4. Personi përgjegjës për prokurimin merr informacion në mënyrë të vazhdueshme mbi ecurinë e zbatimit të kontratës dhe në rast të konstatimit të problematikave në këtë proces, ia raporton APP-së.

Në përfundim të kontratës, autoriteti kontraktor përgatit një raport përmbledhës për korrektësinë dhe cilësinë e zbatimit të kontratës, problemet e hasura gjatë zbatimit dhe masat e marra për zgjidhjen e tyre, nëse është rasti. Një kopje e këtij raporti i dërgohet APP-së, si dhe mund t’i vihet në dispozicion kontraktorit, me kërkesë të tij, nga personi/at përgjegjës për prokurimin.

5. Gjatë kohës së zbatimit të kontratës për furnizimin me karburant, gazoil, benzol dhe karburant për ngrohje vera absolute e marzhit të fitimit nuk do të ndryshojë gjatë ekzekutimit të kontratës, në rast të luhatjes së çmimeve. Nëse gjatë kohës së zbatimit të kontratës, çmimi sipas Reuters, ndryshon në ulje apo ngritje në raport me çmimin e kontratës, me kërkesë me shkrim të palëve në momentin e shitjes së mallit objekt kontrate autoriteteve kontraktore, kontraktori pasqyron në faturat periodike të shitjes çmimin e mallit, mbështetur në çmimin e bursës sipas Reuters, lëvruar sipas kushtit CIF-në Shqipëri në këtë moment.

6. Autoriteti kontraktor, para pagimit të faturës së mallit, duhet të kontrollojë përqindjen e pranuar të rritjes apo të uljes të çmimit të bursës, sipas Reuters, lëvruar sipas kushtit CIF-Shqipëri, në momentin e shitjes së mallit objekt kontrate autoriteteve kontraktore, si dhe cilësinë e mallit të lëvruar, nëse është e njëjtë me atë për të cilën është shpallur fitues kontraktori”.

#### Neni 42

Në nenin 78 “Ankesat në autoritetin kontraktor”, në pikën 6, gërma “a”, fjalia e parë, pas fjalëve “... nga 3 (tre) persona...” shtohen fjalët “ku të paktën njëri është

ekspert i fushës...” dhe fjalia e dytë pas fjalëve “...1 (një) zyrtari të vetëm” shtohen fjalët “i cili duhet të jetë ekspert fushe”.

#### Neni 43

Në nenin 79 “Sanksionet administrative”, pas pikës 4, shtohet pika 5 me këtë përmbajtje:

“Autoriteti kontraktor përkatës ka detyrimin të informojë Agjencinë e Prokurimit Publik mbi zbatimin e masave, të vendosura sipas pikës 1 të këtij neni, brenda afatit kohor të përcaktuar prej saj”.

#### Neni 44

Në nenin 81 “Masat disiplinore”, pas pikës 2, shtohet pika 3 me këtë përmbajtje:

“Autoriteti kontraktor përkatës ka detyrimin të informojë Agjencinë e Prokurimit Publik mbi zbatimin e masave, të vendosura sipas pikës 1 të këtij neni, brenda afatit kohor të përcaktuar prej saj”.

Ky vendim hyn në fuqi pas botimit në “Fletoren zyrtare”.

**K R Y E M I N I S T R I**

**EDI RAMA**

